

神異典第二百二十七卷

神仙部列傳四

漢一 黃石公

按史記留侯世家留侯張良嘗閒從容步游下邳圯上有一老父衣褐至良所直墮其履圯下顧謂良曰孺子下取履良愕然欲毆之爲其老彊忍下取履父曰履我良業爲取履因長跪履之父以足受笑而去良殊大驚隨目之父去里所復還曰孺子可教矣後五日平明與我會此良內怪之跪曰諾五日平明良往父已先在怒曰與老人期後何也去曰後五日早會五日鷄鳴良往父又先在復怒曰後何也去曰後五日復早來五日良夜未半往有頃父亦來喜曰當如是出一編書曰讀此則爲王者師矣後十年興十三年孺子見我濟北穀城山下黃石卽我矣遂去無他言不復見旦日視其書乃太公兵法也良因異之常習誦讀之後十三年從高帝過濟北果見穀城山下黃石取而葆祠之留侯死并葬黃石冢每上冢伏臘祠黃石

注

正義曰括地志云穀城山一名黃山在濟州東阿

縣東濟州故濟北郡孔文祥云黃石公鬚眉皆白杖丹黎履赤帛

按續文獻通考黃石公下邳

人遭秦亂自避姓名人莫知者

張良

按漢書本傳良字子房其先韓人也大父開地相韓昭侯宣惠王襄哀王父平相釐王悼惠王悼惠王二十三年卒卒二十歲秦滅韓良年少未宦事韓韓破良家僮三百人弟死不葬悉以家財求客刺秦王爲韓報仇以五世相韓故良嘗學禮淮陽東見倉海君得力士爲鐵椎重百二十斤秦皇帝東遊至博浪沙中良與客狙擊秦皇帝誤中副車秦皇帝大怒大索天下求賊急甚良乃更名姓亡匿下邳良嘗閒從容步游下邳圯上有一老父衣褐至良所直墮其履圯下顧謂良曰孺子下取履良愕然欲毆之爲其老乃彊忍下取履因跪進以足受之笑而去良殊大驚父去里所復還曰孺子可教矣後五日平明與我期此良因怪之跪曰諾五日平明良往父已先在怒曰與老人期後何也去後五日蚤會五日鷄鳴往父又先在復怒曰後何也去後五日復蚤來五日良夜半往有頃父亦來喜曰當如是出一編書曰讀是則爲王者師後十年興十三年孺子見我濟北穀城山下黃石卽我已遂去不見旦日視其書迺太公兵法良因異之常習誦居下邳爲任俠項伯嘗殺人從良

匿後十年陳涉等起良亦聚少年百餘人景駒自立爲楚假王在陳留良欲往從之行道遇沛公沛公將數千人略地下邳遂屬焉沛公拜良爲廐將良數以太公兵法說沛公沛公喜常用其策良爲他人言皆不省良曰沛公殆天授故遂從不去沛公之薛見項梁共立楚懷王良乃說項梁曰君已立楚後而韓諸公子橫陽君成賢可立爲王益樹黨項梁使良求韓成立爲韓王以良爲韓司徒與韓王將千餘人西略韓地得數城秦輒復取之往來爲游兵潁川沛公之從雒陽南出轅轅良引兵從沛公下韓十餘城擊楊熊軍沛公迺令韓王成留守陽翟與良俱南攻下宛西入武關沛公欲以二萬人擊秦峽關下軍良曰秦兵尙彊未可輕臣聞其將屠者子賈豎易動以利願沛公且留壁使人先行爲五萬人具食益張旗幟諸山上爲疑兵令酈食其持重寶啗秦將秦將果欲連和俱西襲咸陽沛公欲聽之良曰此獨其將欲叛士卒恐不從不從必危不如因其解擊之沛公迺引兵擊秦軍大破之逐北至藍田再戰秦兵竟敗遂至咸陽秦王子嬰降沛公沛公入秦宮室帷帳狗馬重寶婦女以千數意欲留居之樊噲諫沛公不聽良曰夫秦爲無道故沛公得至此爲天下除殘去賊宜縞素爲資今始入秦卽安其樂此所爲助桀爲虐且忠言逆耳利於行毒藥苦口利於病願沛公聽

樊噲言沛公乃還軍霸上項羽至鴻門欲擊沛公項伯夜馳至沛公軍私見項伯欲與俱去項伯曰臣爲韓王送沛公今事有急亡去不義迺具語沛公沛公大驚曰爲之奈何項伯曰沛公誠欲背項王耶沛公曰鯁生說我距關毋內諸侯秦地可王也故聽之項伯曰沛公自度能却項王乎沛公默然曰今爲奈何項伯因要項伯見沛公沛公與伯飲爲壽結婚令伯具言沛公不敢背項王所以距關者備他盜也項羽後解語在羽傳漢元年沛公爲漢王王巴蜀賜項金百鎰珠二斗項具以獻項伯漢王亦因令項伯遣項伯使請漢中地項王許之漢王之國項伯送至褒中遣項伯歸韓王因說漢王燒絕棧道示天下無還心以固項王意迺使項伯還行燒絕棧道項伯歸至韓聞項羽以項伯從漢王故不遣韓王成之國與俱東至彭城殺之時漢王還定三秦項伯乃遣項王書曰漢王失職欲得關中如約卽止不敢復東又以齊反書遺羽曰齊與趙欲并滅楚項羽以故北擊齊項伯迺間行歸漢漢王以項伯爲成信侯從東擊楚至彭城漢王兵敗而還至下邳漢王下馬踞鞍而問曰吾欲捐關已東等棄之誰可與共功者良曰九江王布楚梟將與項王有隙彭越與齊王田榮反梁地此兩人可急使而漢王之將獨韓信可屬大事當一面卽欲捐之捐之此三人楚可破也漢王乃遣隨何說九江王布而使人連彭越

及魏王豹反使韓信特將北擊之因舉燕伐齊趙然卒破楚者此三人力也良多病未嘗特將兵常爲書策臣時時從漢三年項羽急圍漢王於滎陽漢王憂恐與酈食其謀撓楚權酈生曰昔陽伐桀封其後杞武王誅紂封其後宋今秦無道伐滅六國無立錐之地陛下誠復立六國後此皆爭戴陛下德義願爲臣妾德義已行南面稱伯楚必斂衽而朝漢王曰善趣刻印先生因行佩之酈生未行良從外來謁漢王漢王方食曰客有爲我計撓楚權者具以酈生計告良曰於子房何如良曰誰爲陛下畫此計者陛下事去矣漢王曰何哉良曰臣請借前箸以籌之昔湯武伐桀紂封其後者度能制其死命今也陛下能制項籍死命乎其不可一矣武王入殷表商閭式箕子門封比干墓今陛下能乎其不可二矣發鉅橋之粟散鹿臺之財以賜貧窮今陛下能乎其不可三矣殷事以畢偃革爲軒倒載干戈示不復用今陛下能乎其不可四矣休馬華山之陽示無所爲今陛下能乎其不可五矣息牛桃林之野示天下不復輸積今陛下能乎其不可六矣且夫天下游士左親戚棄墳墓去故舊從陛下者但日夜望咫尺之地今乃立六國後唯無復立者游士各歸事其主從親戚反故舊陛下誰與取天下乎其不可七矣且楚雖毋強六國復撓而從之陛下焉得而臣之其不可八矣誠

用此謀陛下事去矣漢王輟食吐哺罵曰豎儒幾敗迺公事令輟銷印後韓信破齊欲自立爲假齊王漢王怒良說漢王漢王使良授齊王信印語在信傳五年冬漢王追楚至陽夏南戰不利壁固陵諸侯期不至良說漢王漢王用其計諸侯皆至語在高紀漢六年封功臣良未嘗有戰鬪功高帝曰運籌策帷幄中決勝千里外子房功也自擇齊三萬戶良曰始臣起下邳與上會留此天以臣授陛下陛下用臣計幸而時中臣願封留足矣不敢當三萬戶迺封良爲留侯與蕭何等俱封上已封大功臣二十餘人其餘日夜爭功不決未得行封上居維陽南宮從復道望見諸將往往數人偶語上曰此何語良曰陛下不知乎此謀反耳上曰天下屬安定何故而反良曰陛下起布衣與此屬取天下今陛下已爲天子而所封皆蕭曹故人所親愛而所誅者皆平生仇怨今軍吏計功天下不足以徧封此屬畏陛下不能盡封又恐見疑過失及誅故相聚而謀反耳上迺愛曰爲將奈何良曰上平生所憎羣臣所共知誰最甚者上曰雍齒與我有故怨數窘辱我我欲殺之爲功多不忍良曰今急先封雍齒以示羣臣羣臣見雍齒先封則人人自堅矣於是上置酒封雍齒爲什方侯而急趣丞相御史定功行封羣臣罷酒皆喜曰雍齒且侯我屬無患矣劉敬說上都關中上疑之左右大臣皆山

東人多勸上都雒陽雒陽東有成臯西有殽函背河鄉雒其固亦足恃良曰雒陽雖有此固其中小不過數百里田地薄四面受敵此非用武之國夫關中左殽函右隴蜀沃野千里南有巴蜀之饒北有胡苑之利阻三面而固守獨以一面東制諸侯諸侯安定河渭漕輓天下西給京師諸侯有變順流而下足以委輸此所謂金城千里天府之國劉敬說是也於是上卽日駕西都關中良從入關性多疾卽道引不食穀閉門不出歲餘上欲廢太子立戚夫人子趙王如意大臣多爭未能得堅決也呂后恐不知所爲或謂呂后曰留侯善畫計上信用之呂后乃使建成侯呂澤劫良曰君常爲上謀臣今上目欲易太子君安得高枕而臥良曰始上數在急困之中幸用臣策今天下安定以愛欲易太子骨肉之間雖臣等百人何益呂澤強要曰爲我畫計良曰此難以口舌爭也顧上有所不能致者四人四人年老矣皆以上嬖侮士故逃匿山中義不爲漢臣然上高此四人今公誠能毋愛金玉璧帛令太子爲書卑辭安車因使辨士固請宜來來以爲客時從入朝令上見之則一助也於是呂后令呂澤使人奉太子書卑辭厚禮迎此四人四人至客建成侯所漢十一年黥布反上疾欲使太子往擊之四人相謂曰凡來者將以存太子太子將兵事危矣迺說建成侯曰太子將兵有功卽位

不益無功則從此受禍且太子所與俱諸將皆與上定天下梟將也今迺使太子將之此無異使羊將狼皆不肯爲用其無功必矣臣聞母愛者子抱今戚夫人日夜侍御趙王常居前上終不使不肯子居愛子上明其代太子位必矣君何不急請呂后承間爲上泣言黥布天下猛將善用兵今諸將皆陛下故等夷迺令太子將此屬莫肯爲用且布聞之鼓行而西耳上雖疾彊載輜車臥而護之諸將不敢不盡力上雖苦彊爲妻子計於是呂澤夜見呂后呂后承間爲上泣而言如四人意上曰吾惟之豎子固不足遣迺公自行耳於是上自將而東羣臣居守皆送至霸上良疾彊起至曲郵見上曰臣宜從疾甚楚人剽疾願上慎毋與楚爭鋒因說上令太子爲將軍監關中兵上謂子房雖疾彊臥傳太子是時叔孫通已爲太傅良行少傳事漢十二月上從破布歸疾益甚愈欲易太子良諫不聽因疾不視事叔孫太傅稱說引古以死爭太子上陽許之猶欲易之乃宴置酒太子侍四人者從太子年皆八十有餘須眉皓白衣冠甚偉上怪問曰何爲者四人前對各言其姓名上迺驚曰吾求公避逃我今公何自從吾兒游乎四人曰陛下輕士善罵臣等義不辱故恐而亡匿今聞太子仁孝恭敬愛士天下莫不延頸願爲太子死者故臣等來上曰煩公幸卒調護太子四人爲壽已畢趨去

上目送之召戚夫人指示曰我欲易之彼四人爲之輔羽翼已成難動矣呂氏真迺主矣戚夫人泣涕上曰爲我楚舞吾爲若楚歌歌曰鴻鵠高飛一舉千里羽翼已就橫絕四海橫絕四海又可奈何雖有矰繳尙安所施歌數闋戚夫人歔歔流涕上起去罷酒竟不易太子者良本招此四人之力也良從上擊代出奇計下馬邑及立蕭相國所與上從容言天下事甚衆非天下所以存亡故不著良乃稱曰家世相韓及韓滅不愛萬金之資爲韓報仇彊秦天下震動今以三寸舌爲帝者師封萬戶位列侯此布衣之極於良足矣願棄人間事欲從赤松子游耳迺學道欲輕舉高帝崩呂后德良乃彊食之曰人生一世間如白駒之過隙何自苦如此良不得已彊聽食後六歲薨諡曰文成侯良始所見下邳圯上老父與書者後十三歲從高帝過濟北果得穀城山下黃石取而寶祠之及良死并葬黃石每上冢伏臘祠黃石子不疑嗣侯孝文三年坐不敬國除按仙傳拾遺張子房名良韓國人也避地於南陽徙居於沛後爲沛國人焉童幼時遇黃石公讀其書能應機權變佐漢祖定天下後人謂其書爲黃石公書修之於身能煉氣絕粒輕身羽化與綺里季東園公角里先生夏黃公爲雲霞之交漢初遇四五小兒路上羣戲一兒曰著青裙入天門揖金母拜木公時人莫知之子房

知之往拜之曰此東王公之玉童也所謂金母者西王母也木公者東王公也此二元尊乃陰陽之父母天地之本原化生萬靈育養羣品木公爲男僊之主金母爲女僊之宗長生飛化之士昇天之初先覲金母後謁木公然後昇三清朝太上矣此歌乃玉童教世人拜王公而揖王母也子房佐漢封留侯爲大司徒解形於世葬於龍首原赤眉之亂人發其墓但見黃石枕化而飛去若流星焉不見其尸形衣冠得素書一篇及兵略數章子房登僊位爲太元童子常從老君於太清之中其孫道陵得道朝崑崙之夕子房在焉

按巢縣志去縣治三十里湖南山中有山端巖聳秀西望巢湖

烟波萬頃層巒複嶺高嶺重阻特藏異境者白雲山也山上有子房祠相傳以爲子房辟穀來隱於此史稱子房從漢高定天下安太子後從上擊馬邑歸卽願棄人間事從赤松子遊乃學辟穀導引輕身會高帝崩呂后強食之留侯不得已強聽而食後八年卒而巢乃有子房辟穀處何也蓋孝惠七年崩呂后稱制將王諸呂故先幾稱卒其實則遠引而去留侯未死也於此隱焉久乃仙去有漢人碑記存舊志謂楚失陰陵非此處旣考據失實而橫斷祠爲道流所構舛謬甚矣萬曆末年樵者於祠旁見一小孔掘之中空入其中則石洞也深廣可居核桃殼極多取之不盡因名核桃洞意必

子房辟穀處祠乃後人所置耳夫既建格天之業而志在赤松之遊白雲之山卽姑射之山矣今祠前建白雲菴地藏殿遠方朝山者衆而仙迹卒不可泯

周栖野

按嵩高志周栖野中嶽人著故破衣隱姓名如風如狂常往來於九衢狂歌曰巾金巾入天門呼長精吸元泉鳴天鼓養泥丸漢之卿相聞其歌頗皆異之相與開釋莫能喻者唯留侯微服往謁延入密室潛有所授約會於嵩山小有洞天後留侯佐漢成功竟從之

清平吉

按神仙傳清平吉沛國人漢高皇帝時衛卒也至光武時容色不老後尸解去百餘年復還鄉里數日間又尸解而去

朱仲

按列仙傳朱仲會稽人常於市上販珠高后時下書募三寸珠仲讀書笑曰眞值汝矣齋三寸珠詣闕上書珠好過度卽賜五百金魯元公主復私以七白金從仲求珠仲獻四寸珠送至闕卽去下書

會稽徵聘不知所在景帝時復來獻三寸珠數十枚輒去不知所之云

匡俗

按洞仙傳匡俗字子希少以孝悌著稱召聘不起至心學真遊諸名山至覆笥山見山上有湖周廻數里多生靈草異物不可識其旁有石井泉通湖中又有石鴈至春秋時皆能羣飛復有小石笥中有玉牒多記名山福地及得道人姓名後復服食得道

按九江府志漢匡俗字君孝本姓匡父平野王共鄱陽令吳芮佐漢定天下而亡漢封俗於鄴陽曰越廬君俗兄弟七人皆好道術精寓於洞庭之山故世謂之廬山謝顗廣福觀碑周威烈王以安車迓匡續續仙去惟廬存因名其山爲靖廬山邦人以先生姓呼匡山又曰匡阜

韓稚

按拾遺記孝惠帝二年四方咸稱車書同文軌天下太平干戈偃息遠國殊鄉重譯來貢時有道士姓韓名稚則韓終之裔也越海而來云是東海神君之使聞聖德洽乎區宇故悅服而來庭時有東極出扶桑之外有泥離之國亦來朝其人長四尺兩角如蠶牙出於脣自乳已下有垂毛自蔽居於

深穴其壽不可測也帝云方士韓稚解絕國人言令問人壽幾何經見幾代之事答曰五運相承迭生迭死如飛塵細雨存歿不可論算問女媧以前可聞乎對曰蛇身已上八風均四時序不以威悅攬乎精運又問燧人以前答曰自鑽火燮腥以來父老而慈子壽而孝義軒以往屑屑焉以相誅滅浮靡蠶薄淫於禮亂於樂世德澆訛淳風墜矣稚具以聞帝曰悠哉杳昧非通神達理者難可語乎斯道矣稚於斯而退莫知其所之帝使諸方士立仙壇於長安城北名曰祠韓館俗云司寒之神祀於城陰按春秋傳曰以享司寒其音相亂也定是祠韓館至二年詔宮女百人文錦萬疋樓船十艘以送泥離之使大赦天下

裴元仁

按鄧雲子清靈真人裴君傳清靈真人裴君字元仁右扶風夏陽人也以漢孝文帝二年君始生焉爲人清明顏儀整素喜於言笑目有精光垂臂下膝聲氣高徹呼如鐘鳴家奉佛道年十餘歲晝夜不寐精思讀經嘗於四月八日與馮翌趙康子上黨皓季成共載詣佛圖時天陰雨忽有賤人著故布單衣巾黃巾詣君車後索載君禮而問之不答君下車以載之康子季成並大怒呵問何等人而

上吾車乎君乃陳諭遂聽俱載君自徒行在後顏無變色寄載人自若亦不以爲慙也將至佛圖乃曰吾家近在此乃下車奄然失之佛圖中道人支子元者亦頗知道宿舊人傳之云已年一百七十歲見君而歎曰吾從少至老見人多矣而未嘗見如子者乃延君入曲室之中幽靜之房大設豐饌飲食既畢將君更移隱處呼之共坐乃謂曰吾善相人莫如爾者子目中珠子正似北斗瑤光星自背已下象如河魁既有貴爵又當神仙天下志願子寶享焉然津梁未啟七氣未淳不見妙事亦無緣而成也因以所修祕術密以告君道人曰此長生內術世莫能知吾昔遊焦山及鼇祖之阿遏仙人蔣先生者乃赤將子輿也以神訣五首授吾奉而行之於今一百七年矣氣力輕壯不覺衰老但行之不勤多失真意不能去世故雖延年不得神仙也猶是行之多違精思不至之罪也今以教子子祕而慎傳之第一思存五星以體象五靈存之法常於密室以夜半後生氣之時服搗五方之氣於寢牀上平坐向月建所在先叩齒九遍咽液三十過畢存想五星使北方辰星在頭上東方歲星在左西方太白星在右南方熒惑星在膝中間中央鎮星在心中久久行之出入遠行常思不忘無所不卻萬禍所不能干也後當奄見五老人則是五星精神也若見者當問以飛仙之道五神共扶

人身形白日昇天第二初以甲子上旬直開除之日爲始以生氣之時夜半之後勿以大醉大飽身體不精皆生疾病也當精思遠念於是男女可行長生之道其法要祕非賢勿傳使男女並取生氣含養精血此非外法專採陰益陽也若行之如法則氣液雲行精醴凝和不期老少之皆返童矣凡入靜先須忘形忘物然後叩齒七通而咒曰白元金精五華敷生中央黃老君和魂攝精皇上升精凝液骨靈無上太真六氣內纏上精元老還神補腦使我合會鍊胎守寶祝畢男子守腎固精煉氣從夾脊遡上泥丸號曰還元女子守心養神煉火不動以兩乳氣下腎夾脊上行亦到泥丸號曰化真養之丹扃百日通靈若久久行之自然成真長生住世不死之道也第三用五行紫文以除三尸常用朔望之日日中時臨目南向臨目者當閉而不閉也心存兩目中出青氣心中出赤氣臍中出黃氣於是三氣相繞合爲一氣以貫一身須臾內外洞徹如火光之狀良久乃叩齒十四通咽液十四過畢此煉形之道除尸蟲之法也久而行之體有五香之氣目明耳聰長生不死第四名曰陰德致神仙之道其文曰常以甲子日沐浴竟甲子上旬日當燒香於所止牀之左右久久行之天仙玉女下降也又一法當養白犬白鷄犬名曰白靈鷄名曰白精諸八節日及行入五嶽乃登名山諸有

神仙之所在處密放鷄犬於其間去勿迴顧天真仙官當與子芝英靈草矣又一法作素奏使長一尺二寸丹書其文曰某郡縣鄉里某欲得長生登仙度世飛行上清真人至神五嶽羣靈三官九府乞除罪名書奏畢以青絲係金銀一雙合以纏奏再拜北向置奏石上因以火燒成灰乃藏銀於密室間而去勿反顧無銀可用條脫一隻以代銀古人名爲縱容珠子也慎與多口嫉妬之人道之非但無益乃更致禍如此十過天上五帝三官九府更相屬敕除人罪過著名生錄刊定仙籍入山求芝艸靈藥所欲皆得山神玉女自來營衛狼虎百害不敢犯近神靈祐助常欲使人得道開人心意惡鬼老魅不敢試人行此道易成而無患若道士不知此術入山必多不利數爲鬼物所試在人間則多軋軻疾病財物不昌所願不從若能行此道長生神仙第五太極真人常以立春之日日中時會諸仙人於太極宮刻玉鸞記仙名常以其夕夜半時正北向仰視北極再拜頓首陳乞己罪多少之數求解釋之意畢復再拜乃止至春分之日日中時崑崙瑤臺太素真人會諸仙官校定真經至立夏之日日中時上清五帝會諸仙人於紫微宮見四真人論求道者之功過至夏至之日日中時天上三官會於司命河侯校定萬民罪福增年減算至立秋之日日中時五嶽諸真人詣中央黃老